

Wanem blong Mekem long Manioc long Taem blong Sik mo Disease?

1. Katem aot ol stampa blong manioc we oli kasem disease. Yu mas traem blong stopem sik ia I kasem ol narafala manioc blong yu.
2. Planem ol narafala crops wetem manioc, blong mekem se ol pipet blong manioc bae oli fas long nara crop blong oli no kasem eni narafala karen.
3. Planem ol tri mo narafala plan raon long karen blong stopem ol pipet blo oli no flae I kam insaed.
4. Jenjem ples blong yu stap planem manioc blong ol pipet oli no stap fulap long graon
5. Usum samfala kastom wei blong kilim ol pipet we I stap spoilem manioc blong yu (olsem pima wota o sam narafala kaen kaen wei) .



Wanem ia ADAPTATION long Climate Change?

Yumi ol man Vanuatu yumi kat powa blong yumi save adapt long Climate Change.

Adaptation I minim se yumi evriwan i mas traem sam niufala wei blong wok wetem weta we yumi stap experience naoia long Vanuatu.

Blong yumi winim Climate Change, bae yumi no mas fraet blong yumi mekem samfala jenj long laef blong yumi, mo blong planem gud fiuja blong ol haoshol mo komuniti blong yumi.

Sapos yu wantem save moa abaot Climate Change mo agrikalja, yu save kontaktem Dipatmen blong Agrikalja, Dipatmen blong Meteo o ringim SPC-GTZ Climate Change Vanuatu.

Mifala I wantem helpem evriwan long Vanuatu blong oli aware long Climate Change mo hao blong dil wetem.

MANIOC & Climate Change

For More Information Contact:

-The Department of
Agriculture and Rural
Development Tel: 22525
-NACCC Tel: 24686

MANIOC &

Climate Change



Hao blong Dil Wetem (adapt long) Climate Change long *Vanuatu*

For More Information Contact:

-The Department of
Agriculture and Rural
Development Tel: 22525
-NACCC Tel: 24686

Wanem ia Climate Change?



Climate Change I save bringim moa saeklon I kam long Vanuatu

Climate Change hemi minim se weta we yumi, mo ol bubu blong yumi, I bin experienem bifo, bae I stap change long fiuja.

Climate Change hemi kos bae yumi ol man taem yumi stap putum ap ol grin haos gas (polusen) I ko antap long sky. Polusen ia I kam aot taem yumi katem mo bonem bus, bonem ol rabis blong yumi, ron long trak o usum genereta.

Climate Change I stap happen finis long yumi long Vanuatu mo raon long wol. Long Vanuatu bae I save minim bigfala ren, bigfala san, drae taem, flad taem, saeklon, moa mosquito, moa disis mo sickness mo si level rise (we solwota I kam antap). Taem weta I jenj bae I save afektem bigwan ol crops blong yumi mo Agriculture long Vanuatu.

Be yumi no mas fraet, olsem we Climate Change hemi kos by yumi ol man, yumi tu ol man yumi save dil wetem.

Blong winim Climate Change yumi mas jenjem smol smol ol wei blong yumi stap life: olsem wei blong mekem Karen, we blong mekem haos, mo wei blong yumi akt.

Hemia nao mining blong adaptesen long Climate Change!!

Manioc mo Climate Change

Climate Change I save spoilem manioc blong yumi. Bigfala san I save bonem ol lif, mekem se kaikai I no gud. Bigfala ren I save mekem se kaikai I stink nomo long graon mo ol sik mo disis I mekem manioc I no gud. Ol saeklon oli save brok-brokem lif manioc mo spoilem kaikai blong hem.

Wanem blong Mekem long Manioc long Taem blong Bigfala San (El Nino)?



1. Mulching hemi taem yu putum ol wid mo gras we yu pulumaot taem yu klinim garen. Yu no mas bonem ol gras ia be putum nomo raon long stampa blong manioc blong protektem kaikai long san mo ren. Bambae yu luk se graon hemi kolkol mo wetwet nomo andanit long mulching.
2. Planem ol forestry tri raon long karen manioc blong givim sed long strong san. Yu save planem ol kaen tri olsem gliricidia we Agriculture I stap givimaot. Ol tri ia bae oli givim sed be sem taem tu bae oli save fidim graon bakegen mo holem taet wota I stap long garen.
3. Usum cover crops long karen bifo yu planem manioc. Ol crops ia olsem mucuna I save holem taet gudfala graon mo tu I save holem taet wota long graon. Lego ol cover crops oli stap long karen taem yu planem manioc, yu no klinim graon tumas, bae san I save bonem.
4. Yu save berem manioc long graon blong kipim smol taem bifo yu kaikai .

Wanem blong Mekem long Manioc long Taem blong Bigfala Ren? (La Nina)

1. Usum ol sids blong manioc blong traem growem aot ol difdifren kaen manioc we maet samfala oli save dil wetem ren moa bitim ol narawan.
2. Usum ol wei blong presevem manioc, olsem manioc flour we I save holem taet manioc long ren taem
3. Digim ol drainage (rod blong wota) blong ren I no save stap fulap long karen.
4. Jusum ol difdifren kaen manioc we yu luk se oli gud long ren taem.
5. Muvumaot manioc karen I ko long wan ples we bae I no save flad long hem (long slope o long drae ples)

Wanem blong Mekem long Manioc long Taem blong Saeklon?

1. Katem aot ol branch blong manioc antap, blong mekem se ol strong win I no save brokem ol han blong manioc.
2. Planem manioc long ol ples we strong win bae I no save kasem, o ples we I stap haed oltaem.
3. Planem ol kaen manioc we oli short short nomo we han I no save ko antap tumas blong kasem wind.

